



Fasnacht 2000

Basler Bebbi Basel Alti Garde

General Sutter, vorwärts marsch: Exodus in 27. Kanton.

D Amerikaner hän dr Bammel
wäg dr Erbschaft vom ene Rammel.
Im General Sutter, dasch das, wo sy schteert,
het schynts halb Kalifornie gheert.
Symbolisch het är iber Nacht
die ganzi Pracht dr Schwyz vermacht.
Doch d Länderey, wo är regiert,
hän d Yankee aifach annektiert.
Sy schigge dr Sutter und sy Train
vom Thron dirägg in Souterrain.
Sy nämme alles, wo sy wänn,
obwohl sy gar kai Rächt druf hän.
Jä, wenn me so durs Gschichtsbuech schländeret,
denn seht me, s het sich gar nyt gänderet.

Die schpiile sich uf als Wälpolizistische
und vergässe, dr aige Schtall uszmischte.
Doch niemerz traut sich ebbis z saage,
drum mache mir jetz **Sammelklaage**.
Mir setze d Ami under Drugg
und **fordere Kalifornie zruigg**.

Mir boykottiere gopfergässe,
mir drohe, schröpfe und erprässe,
mir makes jetz grad umgekehrt:
Dr Heerr d'Amato hets ys glehrt.
Mit eme schadefrohe Grinse
verlange mir Zins und Zinseszins.
Mir sitze uf dr kalifornisch Thron
und grinde dr **sibenezwanzigscht Kanton**.

Hey Mister d'Amato, now you can löörn!
California we are coming, lieber hitte als mörn.
Mir setze d Yankee-Duudler matt,
Los Angeles wird d Kantonshauptschtadt,
und schtatt dr Fahne mit Stars and Stripes
git s Schwyzer Kryz oder suscht ebbis kaibs.
Die **Sammelklaag**, wo mir erwäge,
bringt Kalifornie numme Sääge:
Bevor d als Ami ganz verbleedisch,
ischs zäh Mool besser, wirsch helvetisch,
denn ains isch glaar, s Helvetisch
wär by de Yankee s Ethischi.
Fir die isch jedi Menschewürde
numme iberflissigi Bürde.
Au d Menscherächt sin nyt als Lascht,
s bescht Bischpyyl isch dr Kinderknascht.
Me lyydet derte voller Qual
dangg Dekadänz und Schyynmoraal.
Kaine saits, doch jede dänggts:
Hallo U S A, jetzt länggts.
Sy maine, sy syyge Sitterichter,
drby sin sy raini Moraalvernichter.
Sy wohne gaischtig no im Schilf
und bruuche dringend Entwigglichshilf.

Ihri Kultur, das macht my so muff,
foht bym Cola aa und heert bym Ketch Up uf.
Im **Kanton New Helvetia**
nimmt me sich däne Gleezi aa.
Denn fir dä allerneyscht Kanton
bruuchts Gaischt, Kultuur und Tradition.

Schtatt em Thanks-Giving-Day gits dr erscht Auguscht,
schtatt em Silikonbuuse e nadyrligi Bruscht,
schtatt Chewing Gum hämer Gummibärli,
schtatt em Uncle Ben gits s Dante Klärli,
schtatt dr CNN oder suscht so Gschyys
bringe mr s Radio Edelwyss.
Schtatt ass d vom Bourbon lutter wirsch,
suffsch besser e paar Sutter-Kirsch.
Und schtatt em kalifornische Wyy
derf s au dr Buess vo Sissech sy.
Schtatt dr Venus Williams hämer s Schnyder Patty,
schtatt dr Cindy Crawford hämer suscht e paar Nätti.
Als Kinderschaar in Hollywood
empfähle mr däne d Metzler Ruth,
und schtatt dr Ku-Klux-Klan-Idee
exportiere mr d S V P.

Dr Clinton hebt sich an jedem Halm,
är lehrt efang dr Schwyzer Psalm.
Und d Hillary - die isch denn gscheyt -
macht Morgeschtraich schtatt Street Parade.
Ersatz fir d Lewinsky Monica
hämer allerdings nonig ka.

D Expo und no anderi Sache
kennt me z Kalifornie mache.
S Säxilytte und s Gnaabeschesse
wärde au dert ibere miesse.
Ideal wärs dert, me muess das gseh,
au firs Fasnachts-Comité.

Als Gegelaischtig ze allem däm
pfyffe mir Bebbi dr Unggle Säm
und mache denn noh jeder Rascht
e Achtigstellig am Fahnemascht.
Vor lutter Sutter und Sutterländ
griegt dr Schtrumpfkassier e One-Night-Stand.

Ains isch glaar, die **Sammelklaage**
dien mir sicher nit vertaage.
Dä **Exodus** wird d Yankee hemme.
So what! Califonia mir kemme.
E biirebitzli Schwyzerbluet
das duet eych Sääbelrassler guet.
Mir bringe die Story zem Happy-Änd:
Bye-bye, see you in Sutterländ.

Falls mr nonig deheim im 27. Kanton sin, kasch unseri Ladärne vom
Fasnachtsmäntig zoobe bis am Fasnachtsmittwuch demorge uf em
Minschterplatz beguetachte. Und am zwaite Bummelsunntig traffe mr
ys im Kanton New Helvetia z Kalifornie zemene Schliggli Sutter-
Kirsch. Kunnsch au?

Druck: Thoma AG, Basel